

E ki ana a Te Whatu o Tuhoe “na Te Hautuku, mona i tutaratia e tetahi tangata.”

(Ref.: B. 3/187, T. Turi 17).

Tera te po pango puritia¹ mai
Te tautara ki Waitangi² ra, e!
Ko te rite i taku kiri, e kiia mai nei
E Te Whiri³ ka titiwha tonu;
Titiwha mai ana roto
He paua piri ki te toka.
Ko te naomanga mai kei ahau,
I wharona⁴ tonu atu ko te tonga o te ra.
Ko ana papaihoretanga ki a Uenuku,⁵
Ko te toka i a Parirau,⁶
Ko te karoro a Tamatea hoki.
Me aha koa ia nei
Te waka ka pakaru i taku tinana.
Penei⁷ e reia e au
Ki te ihu o Teretia hoki;
Peke ana au i te tainga riu
O Kanapanapa,⁸
Hai kawē rawa i ahau
Ki te pua⁹ ki te reinga,
Ki oku nei hoa, ka pau
Te tauwehe atu ki tawhiti,
Te pae ki Taiaimai,¹⁰
Ko wai ka kitea e au?
Ko te whakama hoki ra
Tenei rawa ka totope i taku rae, i.

¹Tautara:—Hiwi

²Waitangi:—Ko te Waitangi pea i Pewhairangi ra?

³Te Whiri:—Ki te B.3/187 ‘Tawiri.’

⁴Wharona:—Ki te B.3/187 ‘Hamama.’

⁵Uenuku:—He atua.

⁶Parirau, Te Karoro a Tamatea:—Kei te ngaro enei.

⁷Penei e reia, etc.:—Ko tenei me te rarangi i raro tata iho nei kei ta T. Turi, engari kaore i te B. 3/187.

⁸Kanapanapa:—Kei te ngaro tenei.

⁹Pua ki te reinga:—Tirohia te waiata 88.

¹⁰Taiaimai:—Ko te ingoa nui tera o te takiwa ki Pewhairangi tae atu ki Ohaeawai, ki Kaikohe.

160.—HE WAIATA AROHA,

Na Ngati-awa.

I ahu mai tenei waiata ki te rohe o Ngati-Porou i te tai-whakararo ki Whakatane. Kei reira a Opihi, kei rawahi atu o Whakatane, o te *taone* tonu. Mo reira te whakatauki ra, ‘Ko Opihi whanaunga kore.’ No reira hoki tenei tipuna a Irakewa.